



Naalackersuisut kingusinnerpaamik UPA2019-imut Kalaallit Nunaanni pisortatigoortumik piitsuussutsumik killiliissummik aalajangersaanissaat pillugu Inatsisartut aalajangiiffigisassaattut siunnersuut.

(Inuit Ataqatigiit Inatsisartuni ilaasortaataat)

(Siullermeerneqarnera)

Pisortat innuttaasunut suliniutinik assigiinngitsunik ullutsinni ikiuunnissaminnut periarfissaqarput, aamma aningaasanik annertussusileriikkanik, aqqiissuussanik innuttaasup atugai piviusut naapertorlugit. Annertussusileriikkanik ikiorsiissuteqarneratigut innuttaasut napasinnaanngorlugit ikiorneqartarput.

Tamatuma saniatigut soorlu ilaqtariit meerartallit ikiorneqartarput sunngiffimmi sammisassanut peqataanissaminnut, tassani kommunit tapiisinnaatitaammata akeqanngitsumik sunngiffimmi sammisassanut peqataanissamut. Tamanna ikiorsiissut Demokraatini pingaartut isigaarput, meeqqat inuusuttullu sunngiffimmi sammisassanut suugaluartunulluunniit peqataasariaqarmata ilaqtariit isertitaat apeqqutaatinnagit.

Demokraatini politikkerput imaappoq, innuttaasoq inuunermini ima inissisimalissagaluarpas, ikiortariaqalerluni, taava pisortat pisariaqartitsineq naapertorlugit ikiuuttariaqarput. Ikiorneqartariaqarpoq imminut ikiorsinnaanngorlugu piffissaq qaninnerusoq isigalugu innuttaasoq imminut pilersorsinnaanngorlugu.

Pisoqartarporli ilaqtariinnut meerartalinnut inuuneq artornarsilluinnartarluni. Taamaattumik Demokraatini politikkerarput, ilaqtariit meerartallit pissakilliortut ikiorneqartassasut meerartaat sunngiffummi sammisassanut sunulluunniit akeqanngitsumik peqataasinnaalersillugit soorlu aamma ilinniarnissaminnut akeqanngitsumik ikiorneqartartut. Sunngiffimmi sammisassanut peqataanerup naleqartitat pitsaasut peqqinnartullu pilersittarpai soorlu inuttut pissutsinut aamma timikkut peqqiissuunermut tunngasut.

Kisianni piitsuussutsumut killiliinissaq pisariaqartinneqarpa innuttaasut pisariaqartitsisut ikiornissaannut neqerooruteqartoqartassapat?

Piitsuussutsumut killiliineq sunik aqqiissutisartaqarpa pisortat ikiorsiissutaannik atuuttunik pisinnaatitaanermut naleqqiullugu?



Pissutsinut innuttaasup atugaanut taaguutip atorneqartup innuttaasup imminut ataqqinera imminullu isiginera qaffassarpaa, taaguut nammineq naggataatigut ikiorsiissutip annertussusaanik pitsaassusaanillu allanngortitsinggippat?

Demokraatini isumaqarpugut taamaanngitsoq. Taaguutip nammineq innuttaasup inuunermini atugai pitsanngortinnaviangilai, aaqqissutissanik soqanngippat innuttaasup ullumikkut ikiorneqarsinnaanerata saniatigut periarfissiisunik. Piitsuussutsimut killiliissutip paarlattuanik innuttaasoq aalajangersimasumik isertitalik ataatsimut taaguummot pulatissavaa, ajornerpaamik pisoqassappat eqimattaq taanna nikeriarsinnaajunnaarlugu aamma ikinitsillugit.

Demokraatini kissaatiginngilarput isertitat tunngavigalugit inuiaqatigiinni eqimattanut taaguusersuinissaq atorusunngilarput paasiniarusunneruarpud eqimattanut ataatsinut eqimattanulluunniit arlariinnut aalajangersimasumik isertitaqartartunut ikiorsiissutit naammattut tunniunneqartarnersut soorlu sunngiffimmi sammisassanut assigiimmik peqataasarsinnaanissaannut, eqimattat ataatsit eqimattalluunniit arlariit inuunerminni atugaat pitsanngorsarumallugit.

Taamatut oqaaseqarluta Demokraatini siunnersuut taamatut isikkoqarallartillugu itigartipparput.